

Morašruovttus

Rohkosbottu jodiha báhppa, searvegotti eará bargi dahje searvegotti lahttu.

Vilges liinniin gokčojuvvon beavddi ala sáhtá bidjat Biibbala ja ruossa dahje krusifivssa sihke cahkkehit gintala.

1. Sálbma

Sáhtá geavahit ovdamearkka dihte sálmma 240 dahje 489.

2. Álggahus

Álgosivdnideapme

Buressivdnádusa lea vejolaš lohkat dahje lávlut.

B/O Áhči ja + Bárti ja Bassi Vuoiŋŋa nammii.

S Ámen.

B/O Hearrá lehkos dinguin.

S Nu son lehkos maddái du vuoiŋŋain.

Álggahansárit

Álggahansániid lea maddái vejolaš ráhkadit ieš.

B/O Ráhkis ustibat. Jesus gohčču lusa váiban ja morašteaddji olbmuid.

Son sárdnu: ”Bohtet mu lusa, buohkat geat rahčabehtet ja guoddi-behtet lossa nodiid, de attán didjiide vuoiŋŋadusa.” (Matt 11: 28)

DAHJE

B/O Ráhkis ustibat. NN lea vuolgán dán callimis. Su sadi ruovttus lea guorus. Jápmin moive min jurdagiid ja dárpmehuhtá min. Lea váttis áddet, mii lea dáhpáhuvvan. Moraš dárbbasa áiggi. Ipmila sátni ja rohkos láidejit min oheat veahki Ipmilis. Mii jaskkodit su ovdii.

3. Biibbalsálbma

Sáhtta atnit maiddá girkojagi čuovvu dahje eará biibbalsálmmaid.

Biibbalsálmma sajis lea vejolaš lávlut sálmma.

Biibbalsálmma sáhtta lávlut dahje lohkat. Biibbalsálmii sáhtta laktit Uhca gudni. Uhca gudni guđđojuvvo eret 5. fástoáiggi sotnabeaivvi rájes.

Váibmoládis ja árbmugas lea Hearrá,

son lea guhkesmielalaš

ja su árbmugasvuohta lea stuoris.

Ii son guoddal agibeaivái

ige ane moari agálaččat.

Ii son daga midjiide min suttuid mielde

iige mávssat midjiide min vearredaguid mielde.

Nu allat go albmi lea eatnama bajábealde,

nu stuoris lea Hearrá árbmu sidjiide geat ballet sus.

Nu guhkkin go nuorti lea oarjjis,

nu guhkkin son doalaha min suttuid mis eret.

Nugo áhčči árkkálmastá mánáidis,

nu Hearrá árkkálmastá sin gudet ballet sus.

Dasgo son diehtá mo mii leat sivdniduvvon,

son muitá ahte mii leat muolda.

Olbmo beaivvit leat dego suoidni,

olmmoš lea dego gietti lieddi.

Go bieggá šuviha meattá, de dat jávká,

báiki gos dat lei ii šat dovdda dan.

Muhto Hearrá árbmugasvuohta lea agálašvuodas agálašvuhtii

sin oassi gudet ballet sus.

Su vanhurskkisvuohta ollá mánáid mánáide,

sidjiide gudet dollet su lihtu.

Sál 103: 8–18

DAHJE

Mun geaigguhan giedaidan du guvlui,

mu siellu áibbaša du dego goikan eana čázi.

Doama vástidit munnje, Hearrá,
mu vuoignja roahpána.
Ale čiega mus muoduidat,
aman šaddat sin láhkásažžan gudet leat mannan hávdái.
Divtte mu muosáhit du árbmugasvuoda juohke idida,
dasgo dutnje mun dorvvastan.
Oahpat mu dovdat geainnu man vádjolit,
dasgo mun bajidan sillon du guvlui.

Sál 143: 6–8

Uhca gudni

Gudni Áhččái ja Bárdnái
ja Bassi Vuignii,
nugo lei álggus, dál lea ja álo
agálašvuodas agálašvuhtii. Ámen.

4. Biibballohan

Lohkkojuvvo okta dahje moadde čuovvovaš čálabihtáin.
Sáhtta atnit maid girkojagi čuovvu dahje eará čálabihtáid.
Biibballohkama maŋŋá sáhtta leat jaskes mediteren.

1 Tess 4: 13–18

Oskuguoimmit, mii dáhtošeimmet din diehtit mii dáhpáhuvvá sidjiide
geat leat oaddán jápmimii, amadet moraštit nugo dat geat leat almmá
doaivagahaga. Juos mii oskut ahte Jesus lea jápmán ja bajásčuožžilan,
de mii maddái oskut ahte Ipmil oktan suinna doalvu eallimii sin geat
leat oaddán jápmimii. Dán mii cealkit didjiide Hearrá sátnin: Mii geat
dál leat eallimin ja báhcit dassáži go Hearrá boahtá, eat eisege boade
sin ovdal geat leat oaddán jápmimii. Dasgo go gohččun čuodjá, ja
váldoengela jietna gullo ja Ipmila báson skádjá, dalle Hearrá ieš njiedjá
almmis ja vuosttažin bajásčuožžilit sii geat leat jápmán Kristusis.
Oktan singuin rohttašuvvat dalle balvvaid sisa mii gudet leat eallimin
ja leat báhcán, vai deaivvadit Hearráin áimmus. Dalle mii oažžut

álelassii leat Hearrá luhtte. De jeddejekket guhtet guimmiideattet dáiguin sániiguin!

1 Tess 5: 10–11

Son jámii min ovddas vai mii, gozedettiin dahje oadedettiin, ealášeimmet suinna. Dan dihtii, arvvosmahttet ja nanosmahttet guhtet guimmiideattet, nugo dahkabehtetge.

Joh 5: 24–29

Jesus cealká:

”Duodaid, duodaid, mun cealkkán didjiide: Dat guhte gullá mu sáni ja osku sutnje gii lea vuolggahan mu, sus lea agálaš eallin; son ii boade dupmui, muhto lea juo mannan jápmimis eallimii. Duodaid, duodaid, mun cealkkán didjiide: Boahtá áigi, ja dat lea dál juo, go jábmit gullet Ipmila Bártne jiena, ja sii geat gullet, ožžot eallit. Dasgo nugo Áhčis lea iešalddes eallin, de son lea maiddá suovvan Bárdnáige ahte sus lea iešalddes eallin. Áhčči lea addán sutnje dubmenválldi, dannego son lea Olbmobárdni. Allet imaštala dan, dasgo dat áigi boahtá go buohkat geat leat hávddiin, gullet su jiena ja sii bohtet olggos. Sii geat leat dahkan buriid, bajásčuožžilit eallimii, muhto sii geat leat dahkan baháid, bajásčuožžilit dupmui.”

Joh 14: 1–4

Jesus cealká:

”Alloset din váimmut suorganehko. Oskot Ipmilii ja oskot munnje! Mu Áhččán viesus leat ollu lanjat. Juos nu ii livčče, de mun cealkkášin didjiide dan. Dasgo mun manan gárvvistit didjiide saji. Ja go mun lean mannan ja lean gárvvistan didjiide saji, de boadán fas ja válldán din lusan, vai dii livččiidet doppe gos mun lean. Ja dii diehtibehtet gainnu dohko gosa mun manan.”

5. Sárdni

6. Sálbma

Sáhtta geavahuvvot ovdamearkka dihte sálbma 425, 428 dahje 434.

7. Rohkosoassi

Rohkos

Sáhtta atnit maiddái iešráhkaduvvon rohkosa.

B/O Rohkadallot.

1. Ipmil, Áhččámet. Veahket, amamet mii dán bottu jurddašit dušše jápmima seavdnjatvuoda, muhto muittášeimmet agálaš eallima šearratvuoda. Mii addit NN du oskálí ja giitit du buot buriin, maid don addet midjiide su bokte. Atte Kristusa dihtii ándagassii visot dan, mainna mii rihkuimet guhtet guoibmámet vuostái. Jedde min morrašis. Atte midjiide roahkkatvuoda geahččat boahtteáigge eallima luohttevaš mielain. Mii oskut ja dorvvastit Bárdnásat Jesusii Kristusii, guhte lea bajásčuožžileapme ja eallin.
2. Ipmil, almmálaš Áhččámet. Don dovddat dán bearraša/ruovttu morraša. Don sáhtát addit dorvvu ja jeddehusa. Oro sin luhtte, gudet leat gártan luohpat lagaš olbmos. Atte sidjiide fámu gierdat ráhkis olbmo manaheame. Veahket bearraša/ruovttu olbmuid luohttit dasa, ahte don anát sis fuola ja orut singuin morraša lossa beivviid.

Ipmil, don diedát, maid mii ohealit. Min šuohkanasatge ollejit du bealljái. Dán lohpadusa olis mii bivdit: gula dál maiddái min jaskes rohkosa.

(jaskes boddu)

Giitu das, ahte Beasámet lea vuoitán jápmima. Čuvge dán ruovttu ja morašteaddjiid du sáni ja Kristusa bajásčuožžileame čuovggain. Atte buressivdnádusat ja fámot maiddái juohkebeaivválaš doaimmaide ja bargguide. Láide morašteaddjiid veahkin daid olbmuid, gudet sáhttet

doarjut sin. Mii addit NN, iežamet ja guhtet guoibmámet du oskálii. Ipmil, gula min Bátrnát Jesusa Kristusa dihtii.

3. Ipmil, almmálaš Áhččámet. Mii loaiddastit du ovdii morašváimmuin. Don leat min áidna dorvobáiki, go mii leat oalát návccahuvvan ja skurvvan. Mii oskkildit NN du ráhkisteaddji giedaide. Moraš ja lossa jurdagat leat dál min oassin. Áhčči, don oainnát, mo min callin báhcá mángga láhkai váilevažžan. Árpmi min. Atte fámu, nu ahte nákkešeimmet callit ain beaivvi hávállasi. Divtte idjačorggi nahkáriid áhpásmahhtit min. Vuolgat min lusa ráhkis olbmuid jeddet, veahkehit ja guottihit min ovddasrohkosiiguin. Jedde min bajásčuožžileame ja oddasisoaidnaleame doaivvuin.

S Ámen.

Áhččámet

Hearrá rohkos celkojuvvo ovttá jitnii.

S Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Ja atte midjiide min suttuid ándagassii,

nugo miige ándagassii addit velggolaččaidasamet.

Alege doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.

8. Buressivdnádus

B/O Buressivdnidehkos min buotveagalaš ja árbmugas Ipmil,
Áhčči ja (+) Bárdni ja Bassi Vuoign̄a.

S Ámen.

DAHJE

B/O Hearrá buressivdnidivččii din ja várjalivččii din.

Hearrá čuvgešii muoduidis didjiide

ja livččii didjiide árbmugas.

Hearrá jorgalivččii muoduidis din beallái

ja attášii didjiide ráfi.

Áhči ja + Bárdni ja Bassi Vuoign̄a nammii.

S Ámen.

9. Loahpahanmusihkka

Loahpahanmusihkkan sáhtá atnit ovdamearkka dihte sálmma 430, 444:4
dahje 471. Sálmma sajis sáhtá leat vuoiñgalaš lávlla.